

Salveve voi s' i veule 'n cousta urgensa,  
 Mi continuo a mangè senza geneme;  
 Pensrà per tuti doi la providensa.

*Ah quanti al dì d' ancheui ch' a buto 'n pratica  
 La logica d' coust aso professor!....  
 A dì peui la vrità, cousta gramatica  
 An mostra a stessne 'n pas fora d' rumor.*

## FAVOLA V.

### La Carà d' fen rantanà.

Un pover' om d' un' età quasi avansà,  
 Ant la stagion dle siale e dij cochet,  
 Na carà d' fen a mnava sul marcà;  
 E siccom' as trovava tut solet,  
 E la strà l'era bruta e piena d' sot,  
 L'ha rantanà del cher i prim rovet.  
 A l'ero i pover' cavai massà dai bot,  
 S' aussavo dsora l' anche inutilment,  
 Invan podia sperè d' feje piè 'l trot.  
 Coust om a bestemiava orribilment,  
 A ciamava an agiut Nossignor e i Sant,  
 Vedend ch' ant coul ambreui podia fè nient;  
 Quand as ved comparì da 'n ciel volant  
 Un angel gros, ch' ai dis d' cousta manera:  
 Me car, l'è cosa inutil criè tant;  
 Dà man al palanchin, gava cla pera,  
 Ch' ampacia 'l to carton d' andè diret,  
 Buta d' tera ant 'l sot lung la rovera.  
 L' asto finì d' fè lò? Ciapa 'l to foet,  
 Strivassa i to cavai, e cred a mi,  
 Ch' at brusran l' stradon come 'l folet.

Di fatti ogni pericol l'è svani,  
 La carà s'è bougiasse da coul leugh,  
 E l'è stait coust afè bele fini.

*J'ouma tanti coujon al di d'anchevi,  
 Ch'a veulo fè mai niente, sta speranssa  
 Che 'l ciel ai manda d'gran, melia e fasevi.  
 Nossignor a pensa un foudre a nostra pansa.  
 Agiutte ch' i t' agiuto, a l'è 'l proverbì:  
 Chi sa rangiesse mèi l'è coul ch' avanssa.*

## FAVOLA VI.

### L' Lion malavi.

Tourmentà neuit e di da frev maligna,  
 Fra mes a na boscaja da fè sgiai,  
 Stava l' lion stroujassà con bruta ghigna.  
 Una partia immensa d' animai,  
 Come servi fedei d' soa maestà,  
 A stavo medicandlo ant i so guai.  
 So ministr, bin sicur, l' avia mandà  
 Fratant per le boscaje le pi remote  
 La neuva ch' as trovava incomodà.  
 J' animai d' ogni specie da soe crote  
 Son fasse un ampessman d' vni a trovelo  
 Per deje quaich agiut con le soe piote.  
 L' ero tuti concours a medichelo,  
 Fora dla volp, ch' a l' era poch davsìn,  
 Ch' andava a serchè d' erbe per purghelo.  
 Per dè d' antende a l' lion d' voreije bin,  
 Sour luv a fa la spia al so sovràn,  
 Ch' la volp l' ha ricusà d' feje l' inchin.